

**ALL INDIA RADIO  
RNU :: KOLKATA**

**BENGALI TEXT BULLETIN**

**DATE -16.10.2017**

**TIME - 01:40 P.M**

দার্জিলিং পার্বত্য এলাকা থেকে সরকার ১০ কোম্পানি কেন্দ্রীয় বাহিনী প্রত্যাহারের সিদ্ধান্ত নিয়েছে। আজ এই বাহিনী সরিয়ে নেওয়া হবে বলে কেন্দ্রীয় স্বরাষ্ট্রমন্ত্রক রাজ্যসরকারকে এক বিজ্ঞপ্তিতে জানিয়েছে। এর ফলে পাহাড়ে এখন ৫ কোম্পানি কেন্দ্রীয় বাহিনী থাকবে। রাজ্য সরকার এই সিদ্ধান্তে তীব্র অসন্তোষ প্রকাশ করেছে। রাজ্যের বক্তব্য জানিয়ে স্বরাষ্ট্রমন্ত্রককে চিঠি দেওয়া হয়েছে বলে নবান্ন সূত্রে খবর।

এদিকে, রাজ্য সরকার প্রতিবাদ জানালেও গোখাঁ জনমুক্তি মোর্চা, পাহাড় থেকে বাহিনী প্রত্যাহারের সিদ্ধান্তে কেন্দ্রের প্রতি কৃতজ্ঞতা প্রকাশ করেছে। স্বরাষ্ট্রমন্ত্রী রাজনাথ সিংকে লেখা এক চিঠিতে মোর্চা বলেছে, এই সিদ্ধান্তের অর্থ, গোখাঁদের সততার প্রতি কেন্দ্রীয় সরকারের পূর্ণ আস্থা রয়েছে। মোর্চাকে শেষ করার জন্য এক গভীর ষড়যন্ত্র চলেছে এবং রাজ্যের মুখ্যমন্ত্রী ও তৃণমূল কংগ্রেস নেতৃত্ব পুলিশের সাহায্য নিয়ে তাদের ওপর দমন-পীড়ন চালাচ্ছে বলে মোর্চার অভিযোগ। তাদের দাবি, বিমল গুরুঙ্গকে সন্ত্রাসবাদী ও জাতীয়তাবিরোধী হিসেবে তুলে ধরে রাজ্যসরকারের চক্রান্তের তত্ত্ব, কেন্দ্র যে

বিশ্বাস করে না, পাহাড় থেকে অবিলম্বে বাহিনী প্রত্যাহারের সিদ্ধান্তই তার প্রমাণ ।

অন্যদিকে, নবান্নে আজ পাহাড় নিয়ে আরেক দফা সর্বদল বৈঠক বসছে। জিটিএ-র অস্থায়ী প্রধান বিনয় তামাং ও ভাইস চেয়ারম্যান অনীত থাপা গোর্খা জনমুক্তি মোর্চার প্রতিনিধি হিসেবে এতে যোগ দেবেন । গতকাল শ্রী তামাং কলকাতায় রাজভবনে রাজ্যপাল কেশরীনাথ ত্রিপাঠীর সঙ্গে দেখা করেন । পাহাড় নিয়ে ত্রিপাঠীক বৈঠকে কেন্দ্র বিমল গুরুঙ্গকে ডাকবে কিনা, সাংবাদিকদের এই প্রশ্নের জবাবে বিনয় তামাং বলেন, যে ব্যক্তির বিরুদ্ধে ইউএপিএ-তে মামলা রুজু হয়েছে এবং লুক আউট নোটিশ জারি রয়েছে, তাকে কেন্দ্র ডাকবে বলে তিনি মনে করেন না ।

পাতলেবাসে গুরুঙ্গ অনুগামী চার নেতার বাড়িতে আগুন লাগার ঘটনা সম্পর্কে জানতে চাওয়া হলে শ্রী তামাং বলেন, পুলিশ বিষয়টি তদন্ত করে দেখছে । পুলিশ এবং সিআইডি'র কর্তারা গতকাল ঘটনাস্থল ঘুরে দেখেন। অগ্নিকাণ্ডের প্রকৃত কারণ অনুসন্ধানে সিআইডি'র সৈন্যদের একটি দল দার্জিলিং গেছে বলে এডিজি-সিআইডি রাজেশ কুমার জানিয়েছেন ।

এদিকে, বিমল গুরুঙ্গকে গ্রেপ্তার করার জন্য দার্জিলিংএর পুলিশ সুপার অখিলেশ চতুবেদীর নেতৃত্বে পাহাড়ের বিভিন্ন জায়গায় তল্লাশি অভিযান চলছে। আজও বিনয় তামাংএর বিরুদ্ধে জনতার নাম দিয়ে কিছু পোষ্টার পড়ে। এই পোষ্টারে বলা হয়েছে, অবিলম্বে জি.টি.এ-২ কে খারিজ করতে হবে।

আজ নবান্নের বৈঠকে সবদল উপস্থিত থাকলেও জন আন্দোলন পার্টি এবং গোখাঁ লীগের যোগদান নিয়ে সংশয় রয়েছে ।

\*\*\*\*\*

কলকাতা সহ বিভিন্ন জায়গায় আসন্ন কালীপূজো উপলক্ষে বাজিবাজার বসেছে। রায়গঞ্জ পুরসভার উদ্যোগে আজ সোমবার থেকে রায়গঞ্জ স্টেডিয়ামে বাজিবাজার বসেছে । আগামী বিশে অক্টোবর পর্যন্ত এই বাজিবাজার চলবে । এবছর বাজি বাজার করা নিয়ে প্রথমে ব্যবসায়ীদের আপত্তি থাকলেও পরবর্তীতে সমস্ত দিক বিচার করে ও সব পক্ষের সঙ্গে বৈঠক করে শেষ পর্যন্ত বাজি বাজার সিদ্ধান্ত নেয় পুরসভা । এবারে বাজি বাজারে মোট ৬৬টি স্টল থাকছে । নিরাপত্তার কথা মাথায় রেখে প্রতি আটটি স্টলের পর ফাঁকা জায়গা রাখা হচ্ছে ।

\*\*\*\*\*

নদীয়ার কল্যাণীর বুদ্ধবাটি অঞ্চলে আলোর বাজির রোশনাইয়ে কালীপূজো এবং দেওয়ালীর অন্যতম আকর্ষণ তুবড়ির খোল। মাটি দিয়ে তৈরী করে ওই খোল চলে যায় পাশের রথতলার বাজি তৈরীর কারখানায় । ওই খোলের ভিতর বারুদ পুড়ে এবং খোলের বাইরে রঙীন কাগজ লাগিয়ে বাজারে বিক্রি করা হয়। বেশ কয়েকটি পরিবারের এখন চরম ব্যস্ততা । এই খোল তৈরীর জন্য প্রয়োজনীয় মাটি আগে গঙ্গার পাড় থেকে সংগ্রহ করা হলেও বর্তমানে

ইটভাটার মালিকরা নিজেরাই মাটি তুলে নেওয়ায়, তাদের চরম সমস্যার মধ্যে পড়তে হয়েছে ।

এদিকে, সাধক ব্যামাখ্যাপার বংশধরের পূজো বলে খ্যাত রায়গঞ্জের বন্দর আদি কালীবাড়ির শ্যামাপূজো উপলক্ষে দীপাবলীর প্রস্তুতি তুঙ্গে । প্রায় পাঁচশো বছরের প্রাচীন এই কলীপূজোকে ঘিরে রাজ্যের বিভিন্ন প্রান্ত এমনকি ওপার বাংলা থেকেও হাজার হাজার ভক্তের সমাগম হয় এখানে । ১২১৬ বঙ্গাব্দে বাংলাদেশের দিনাজপুরের রাজা তারকনাথ রায়চৌধুরীর উদ্যোগেই নির্মাণ হয়েছিল বন্দর আদি কালীমন্দির । আজও সেবাইত হিসেবে পূজো করে আসছেন সাধক ব্যামাখ্যাপার বংশধরেরা ।

\*\*\*\*\*

পশ্চিম মেদিনীপুরের কেশপুর ব্লকের ৭নম্বর তেঘরি গ্রামপঞ্চায়েতের খেজুরবনি গ্রামে ডায়ারিয়ার প্রকোপ দেখা দিয়েছে । এ পর্যন্ত কুড়ি জন গ্রামবাসী ডায়ারিয়ায় আক্রান্ত হয়েছেন । তাদের মধ্যে পাঁচজনকে মেদিনীপুর মেডিকেল কলেজ হাসপাতালে ভর্তি করা হয়েছে । সেখানেই তাঁরা চিকিৎসাধীন রয়েছেন। জেলার মুখ্য স্বাস্থ্য আধিকারিক গিরীশ চন্দ্র বেরা জানিয়েছেন, ঐ এলাকায় মেডিকেল টিম কর্মরত রয়েছে । একটি পুকুরের জল থেকেই রোগের সংক্রমণ ঘটেছে বলে মনে করা হচ্ছে । ঐ পুকুরের জল শোধনের কাজ শুরু হয়েছে । গিরীশবাবু এলাকা পরিদর্শন করে এসেছেন এবং পরিস্থিতি বর্তমানে নিয়ন্ত্রণে রয়েছে বলে তিনি জানিয়েছেন ।

\*\*\*\*\*

বিধাননগরের ইলেকট্রিক কমপ্লেক্স থানা এলাকায় ফায়ার ব্রিগেডের অফিসের সামনে আজ সকাল ন'টা নাগাদ পথ দুর্ঘটনায় ২৫ বছর বয়সী এক মহিলার মৃত্যু হয়েছে। পুলিশ সূত্রের খবর হাওড়ার দানেশ শেখ লেন থেকে নিউটাউন গামী একটি বেসরকারী বাস নিয়ন্ত্রণ হারিয়ে ঐ মহিলাকে পিষে দেয়। বাস চালক পলাতক। বাসটি আটক করা হয়েছে।

\*\*\*\*\*

নদীয়ার চাকদা থানার নেউলিয়ায় প্রতিবেশী এক যুবক শ্লীলতাহানি করায় মাধ্যমিক পরিক্ষার্থী এক স্কুল ছাত্রী বিষ খেয়ে আত্মঘাতী হয়েছে। গুরুতর অসুস্থ ওই ছাত্রীকে হাসপাতালে নিয়ে যাওয়ার পথে তার মৃত্যু হয়। কার্তিক বিশ্বাস নামে ওই যুবককে গ্রেপ্তারের দাবীতে স্থানীয় বাসিন্দারা গতরাতে বেশ কিছুক্ষণ চাকদা-বনগাঁ রোড অবরোধ করেন। অভিযুক্তের খোঁজে পুলিশ তল্লাশি চালাচ্ছে।

\*\*\*\*\*